



**Ordonnance nouvelle et declaration du roy nostre sire, sur le
fait des reliefz et rapportz des arrierefiefz tenuz des
seigneuries & biens devoluz à sa maiesté par droit de
confiscation, à cause des troubles passéz**

<https://hdl.handle.net/1874/9079>

12

ORDONNANCE NOUVELLE ET DE- CLARATION DV ROY NOSTRE

SIRE, SVR LE FAIT DES RELIEFZ ET
rapportz des arrierechiefz tenuz des seigneuries
& biens deuoluz à sa maiesté par droit
de confiscation, à cause des
troubles passéz.



EN ANVERS,
De l'imprimerie de Christoffe Plantin
Imprimeur du Roy.



RHILIPPE par la grace de Dieu Roy de Castille, de Leon, d'Arragon, de Nauarre, de Naples, de Sicillo, de Mailorque, de Sardaine, des Isles Indes & terre ferme de la mer Occeane; Archiduc d'Austrice; Duc de Bourgoingne, de Lothier, de Brabant, de Lembourg, de Luxembourg, de Gheldres & de Milan; Conte de Habsbourg, de Flandres, d'Artois, de Bourgoingne palatin, & de Haynnau, de Hollande, de Zelande, de Namur & de Zutphen; Prince de Zvvaue, Marquiz du sainct empire, Seigneur de Frise, de Salins, de Malines, des cité villes & pays d'Vtrecht, d'Oueryssel & Groeninge; Et dominateur en Asie & en Affricque; A tous ceulx qui ces presentes verront, salut. Combien que par autre nostre precedent placcart, du dernier de Feurier passé, Ayons commandé à tous vassaulx & hommes de fief, tenans aulcuns arrierefiefz, mouuans des fiefz à nous deuoluz par droit de confiscatió, à l'occasion des troubles passéz, de renoueller leurs fermés, releuer leursdiétz fiefz, rapporter la valeur d'iceulx, & faire les debuoirs plus amplement comprins audiect placcart, endeans six sepmaines apres la publication: Toutesfois est venu à nostre cognoissance, que plusieurs sont demeuréz deffailans de ce faire, soubz pretext de diuerses causes & excuses par eulx alleguées. **P O V R C E** est il: Que nous desirans sur ce plus prez pourueoir; Auons, par la delibération de nostre treschier & tresamé Cousin, cheualier de nostre ordre, Lieutenant gouuerneur & capitaine general en noz pays de pardeça, le Duc d'Alue, Marquiz de Coria, &c. Ordonné & commandé, Ordonnons & commádons par cestes, que tous ceulx tenans aucuns arrierefiefz mouuans des fiefz à nous (comme dit est) deuoluz, endeans trois mois apres la publication de cestes, facét & accóplissent les susdiets & autres debuoirs; plus prez specifíiez audiect nostre precedét placcart, Et ce pardeuant noz Baillyz, lieux tenás & autres officiers de noz courtz feudalles, dont les fiefz cónsíquéz estoyét tenuz: Et où le fief cónsíqué, ayant arriere fief, ne seroit mouuát de nous, lesdiets debuoirs se feront pardeuant la court cónsíquée,

comme se faisoit auparauant; **Le tout à main vuyde, & sans** acause de ce payer autre droit, que ce qu'ilz seroyent tenuz de payer au changement du seigneur du fief superieur: Et où (pour les raisons comprinses audict placcart) conuiendra faire relief ou autres debuoirs d'aucun arrierefief nō releué, payeront le droit qu'ilz estoient accoustumez de payer en la court, où ilz estoient resortissans deuât ladicte confiscation, **Le tout sur la paine comprinse audict placcart; Sans aucun** support ou dissimulation: & pour le surplus, demeureront les courtz desdictz fiefz confisqueez comme auparauant. Et afin qu'on puisse mieulx sçauoir les arrierefiefz, qui ne seront endans ledict temps releuez; **Voulons & ordonnons** à tous officiers des courtz feudales des fiefz confisqueés, que endeas le terme de trois semaines apres la publication de cestes, Ilz ayent à enuoyer en nostre court feudale, où ilz estoient auant la confiscation resortissans, le nombre des arrierefiefz tenuz des fiefz confisqueés comme dessus, Sur paine, que à faulte de ce, commissaire sera enuoyé à cest effect, à leurs fraiz & despens. **Au surplus commandons & ordonnons** le susdict placcart estre gardé & obserué en tous ses pointz & articles, avec les declarations susdictes. Et comme aucunes personnes tenans fiefz desdictz fiefz confisqueés, sont residés dehors nosdictz pays, & qu'ilz ont ou doibuent auoir hōme seruant en leur lieu: **Nous voulons** que les publicacions qui seront faites en nosdicts pays de pardeça, es lieux & maniere accoustuméz, soyent de telle valeur & effect pour ceulx se tenans dehors nosdicts pays de pardeça, comme si icelles fussent faites au lieu de leur domicile & residence, & pour telles les auons auctorisé & auctorisons par cestes: **Si donnōs** en mandement à noz treschiers & seaulx les chiefz & gens de noz consaulx d'estat, Priuē & des Finances: **President & gens de nostre grant conseil, Chancelier & gens de nostre conseil en Brabant; Gouverneur, President & gens de nostre conseil à Luxembourg; Gouverneur, Chancelier & gés de nostre conseil en Gheldres; Gouverneur de Lembourg, Faulquemōt, Daelhē & d'autres noz pays d'oultre-Meuze; Gouverneur, Presidens & gens de noz consaulx en Flandres & Artois; Grantbailly de Haynnau & gens de nostre conseil**

à Mons; Gouverneur, President & gens de nostre conseil en
Hollande; Gouverneur, President & gens de nostre conseil
à Namur; Gouverneur, President & gens de nostre conseil
en Frize; Gouverneur, Chancelier & gens de nostre conseil
en Oucryffel; Lieutenant de Groeningen; Gouverneur,
President & gens de nostre conseil à Vtrecht; Gouverneur
de Lille, Douay & Orchies; Preuost le Conte à Valenciènes;
Baillly de Tournay & du Tournesiz; Rentmaistres de Bevest
& Beoisterfchelt en Zelande; Escoutette de Malines; Et à
tous autres noz iusticiers & officiers & ceulx de noz vassaulx
& seigneurs bassains, cui ce regardera, leurs lieux tenans &
chascun d'eulx endroit soy, & sicomme à luy appertiendra,
Que ceste nostre presente ordonnance & declaracion, ilz
facent incontinent publier chascun en son endroit, es lieux
& limites de leur iurisdiction, où lon est accoustumé faire
criz & publicacions, afin que nul n'en puisse pretendre cause
d'ignorace: Et ausurplus la facent garder, obseruer & entre-
tenir, selon sa forme & teneur: en procedant, & faisant pro-
ceder par ceulx qu'il appertiendra, contre les deffailans par
l'execution des paines dessusmentionnées, sans aucune fa-
ueur, port ou dissimulation: De ce faire & qui en depend,
leur donnons & à chascun d'eulx, plain pouoir, auctorité &
mandement especial; Mandons & commandons à tous, que
à eulx, ce faisant, ilz obeyssent & entendent diligamment:
Car ainsi nous plaist il. En tesmoing de ce, nous auons fait
mettre nostre seel à ces presentes. Donné en nostre ville
d'Anuers, le dernier iour d'Octobre, l'an de grace mil cinq
cens soixante dix. De noz regnes, assçauoir des Espaignes, Si-
cille, &c. le xv^{me}. & de Naples le xvij^{me}.

*Par le Roy
En son conseil.*

D'ouerloepe.

S O M M A I R E D V
P R I V I L E G E .

IL EST permis par le Roy nostre sire, à Christop hle Plantin son
Prototypographe iuré, residēt en la ville d' Anuers; de pouuoir im-
primer, vendre & distribuer, en & par tous les pays de pardeça,
L'ORDONNANCE nouvelle & declaration du Roy no-
stre sire, sur le faict des reliefz & rapportz des arrierefiefz
tenuz des seigneuries & biens deuoluz à sa maiesté par
droit de confiscation, à cause des troubles passéz: Comme plus
amplement appert par les lettres d' Octroy sur ce données en date du
X I I I . iour de Novembre, l' an M . D . L X X .

Soubsigné

De la Torre.